

四庫全書薈要

• 乾隆御覽本

史部

欽定四庫全書薈要

史部  
宋史紀事本末卷二十三

詳校官員外郎臣楊世綸



宋史紀事本末卷二十三

明馮琦撰

陳邦瞻輯



蒙古侵金

寧宗開禧二年十二月蒙古却特特穆津稱帝于鄂諾河特穆津之先有曰勃端察爾母曰阿掄郭幹生二子而寡居夜寢屢有光明照其腹又生三子勃端察爾

其季也其後子孫蕃衍各自為部居于烏桓之北與衛  
拉特奈曼九姓回鶻故城和林接壤世奉貢于遼金而總  
隸于韃靼至伊蕪克依并吞諸部勢愈盛大攻塔塔爾部  
獲其部長特穆津還次于特里袞布達拉山而生子因以  
特穆津名之伊蕪克依死特穆津年幼其部衆多歸于族  
人泰楚特部率部人為十三翼大戰泰楚特等敗因得  
少安時泰楚特部地廣民衆而無紀律其下謀曰特穆  
津衣人以己衣乘人以己馬真吾主也因悉歸之泰楚

特部遜微未幾塔塔爾部叛金特穆津自鄂諾河帥衆  
會金師同滅之以功封特穆津為察袞圖嚕猶中國之  
招討使也特穆津以奈曼部強盛事之甚謹奈曼反侵  
掠之特穆津乃大會屬部于特默格川議伐奈曼奈曼迪  
延汗營于杭愛山與默爾奇斯諸部合兵勢頗盛特穆津  
與之大戰擒殺迪延汗諸部悉潰特穆津益以盛強明  
年遂攻西夏破拉吉哩寨經婁斯城大掠而還至是大  
會諸部長于鄂諾河之源即位建九旂白旗諸王羣臣

其上尊號曰青吉斯皇帝先是紹興中金人屢擊蒙古不能克邊與之和金主嘗遣衛王允濟往靖州受特穆津之貢允濟竒其狀馳歸言于金主請以事除之金主不許特穆津聞而憾之特穆津既即位遂發兵復征奈曼滅之執伯嚕克汗以歸

嘉定元年冬蒙古征托克托及楚察里汗時幹伊喇等部遇蒙古前鋒不戰而降因用為鄉導討默爾奇斯部滅之托克托中流矢死楚察里奔契丹是年金主璟卒衛王允

濟立

二年三月輝和爾國降于蒙古輝和爾即唐之高昌也  
五月蒙古兵入靈州夏主安全納女請降於蒙古夏  
自是益衰

三年十二月蒙古侵金先是金主永濟嗣位有詔至蒙  
古傳言當拜受蒙古主謂金使曰新天子為誰曰衛王  
也蒙古主遽南面嚙曰我謂中原皇帝是天工人做此  
等庸懦亦為之也何以拜為即乘馬北去金使還言永

濟怒欲俟蒙古入貢就害之蒙古主知之遂與金絕並  
嚴兵為備數侵掠金西北之境其勢漸盛金人皇皇禁  
百姓傳說邊事

四年夏四月金使人求和于蒙古蒙古不許初金納答塔  
邁珠守北鄙知蒙古將侵邊奔告于金主金主曰彼於  
我無釁汝何言此邁珠曰近見其鄰部附從西夏獻女  
而造箭製楯不休凡行營則令男子乘車蓋欲惜馬力  
也非圖我而何金主以其擅生邊隙因之及蒙古侵擾



雲中九原連歲不休遂破大水灤以進金主始恐乃釋  
邁珠之囚遣西北路招討使鈕祜祿哈達求和蒙古主不  
許金主乃命平章政事通告遷嘉努叅知政事完顏和  
碩行省事于撫州西京留守赫舍哩呼沙呼行樞密院  
事以備邊 八月金通告遷嘉努完顏和碩至烏沙堡  
未及設備蒙古兵奄至拔烏沙堡及烏月營破白登城  
遂攻西京凡七日呼沙呼等懼以麾下棄城突圍遁去  
蒙古主以精騎三千馳之金兵大敗追至翠屏山遂取

西京及桓撫州蒙古主復遣其子卓齊特察罕台諤格德依  
三人帥兵分取雲內東勝武朔豐靖等州由是金德興  
弘州昌平懷來緡山豐潤密雲撫寧集寧東過平灤南  
至清滄由臨潢過遼河西南至忻代皆降于蒙古 閏  
九月蒙古主既破撫州休士牧馬將遂南向金主復命  
招討使完顏糾堅監軍完顏鄂諾勒等率兵號四十萬駐  
野狐嶺以備和碩率重兵為後繼或謂糾堅曰蒙古新  
破撫州方以所獲賜其下馬牧于野當乘其不虞掩擊

之糾堅曰此危道也不若馬步俱進為計萬全蒙古主  
聞之進兵于獲兒葡糾堅遣麾下明安問蒙古舉兵之  
故明安反降于蒙古以虛實告之蒙古主遂與糾堅等  
戰金兵大敗入馬蹂躪死者不可勝計蒙古乘銳而前  
和碩畏其鋒不敢拒戰引兵南行蒙古兵踵擊之至會  
河僅金兵又大敗和碩僅以身免走入宣平蒙古兵乘  
勝薄宣平遂克晉安縣遊兵至居庸關守將完顏福壽  
棄關遁蒙古兵克之金中都戒嚴禁男子不得輒出城

蒙古遊兵至都城下金主欲南奔汴會衛卒誓死逆戰

蒙古兵多所損折迷囊金羣牧監驅其馬而去金主乃

止命秦州刺史珠赫呼高琪屯通玄門外尋降和碩為咸

平路兵馬總管將士以其罰輕由是益不用命 十一

月金圖克坦鎰初為工京留守蒙古兵日攻西北曰事急

矣乃選兵二萬遣同知烏克遜鄂吞將之入衛金主嘉

之檄拜右丞相鎰上言曰自國家與鞑靼交兵以來彼

聚而行我散而守以聚攻散其敗必然不若入保大城

併力備禦昌桓撫三州素號富貴人皆健勇可內徙之  
以益兵勢人畜財貨不至亡失叅政梁鏜曰如此是自  
感境土也金主從鏜謀鎰復奏曰遼東國家根本距中  
都數千里萬一受兵州府顧望必須報可誤事多矣可  
遣大臣行省以鎮之金主不悅曰無故置行省徒搖人  
心耳不從及失三州又聞東京不守金主乃大悔曰從  
丞相之言當不至此我見丞相恥哉呼沙呼之棄西  
京而還也至蔚州擅取官庫銀五千兩及衣幣諸物奪

官民馬與從行人入紫荆關殺涑水令至中都金皆不問以為右副元帥呼沙呼益無所忌憚自請兵二萬北屯宣平金主與之三千令屯媯州呼沙呼不悅

五年三月金呼沙呼欲移屯南口移文尚書省曰韃靼兵來必不能支一身不足惜三千兵為可憂十二關建春萬寧宮俱不保金主惡其言下有司按問詔數其十五罪罷歸田里 蒙古主既克宣平遂攻德興府坎墉而登金人禦之蒙古兵不利蒙古主第四子圖類與齊勒

濟駙馬復擁楯先登而射之金兵引却蒙古遂盡拔德興境內諸城堡而去金人復守之

六年五月金主承濟復以赫舍哩呼沙呼為右副元帥八月金主復用呼沙呼使將兵屯燕城北圖克坦猛切諫不聽呼沙呼與其黨完顏綽諾富察埒爾錦烏庫哩道刺等謀作亂金主以蒙古兵在居庸關而呼沙呼日務馳獵不恤軍事遣使責之使者至呼沙呼怒遂妄稱知大興府圖克坦南平謀反奉詔入討分其軍為三由章義

門入自將一軍由通玄門入恐城中兵出拒先遣一騎  
馳抵東華門大呼曰韃靼至此關已絕戰矣既又遣一  
騎往亦如之乃使其黨圖克坦金壽召圖克坦南平南平不  
知行至廣陽門呼沙呼遇之於馬上手刃殺之完顏錫  
古納聞亂召兵五百迎戰不勝皆殺之呼沙呼至東華  
門護衛色埒默和爾等納之呼沙呼入宮盡以其黨易宿  
衛自稱監國都元帥居大興府陳兵自衛名聲伎與親  
黨會飲明日以兵逼金主出居衛邸遣武衛兵二百固



守之呼沙呼欲除拜其黨令黃門入宮收璽尚宮左夫  
人鄭氏掌璽璽拒之曰璽天子所用呼沙呼人臣取將  
何為黃門曰今天時大變主工且不保况璽乎御侍當  
思自脫計鄭氏厲聲罵曰若輩宮中近侍恩遇尤隆君  
難不以死報反為逆豎奪璽耶我死可必璽必不與遂  
瞑目不語黃門乃還呼沙呼復遣人奪取宣命之寶除  
拜其黨數十人丞相圖克坦鎰時以陸馬傷足在告聞難  
作命駕將入省或告之曰省府守以軍士守之不可入

矣少頃軍士索人於閭巷鎡乃還第呼沙呼欲僭位猶豫不決以鎡人望乃詣訪之鎡從容謂曰昇王章宗之兄顯宗長子衆望所屬元帥決策立之萬世之功也呼沙呼默然乃遣宦者李思中弑金主於邸時完顏綱將兵十萬行省事于緡山呼沙呼誘而殺之因盡撤沿邊諸軍赴中都平州騎兵屯薊州以自重遣圖克坦銘等迎昇王珣于彰德九月至燕即位立子守忠為太子追廢永濟為東海郡侯後追復衛王諡曰紹 蒙古兵至懷

來金元帥右監軍珠赫呼高琪拒之敗績僵尸四十餘里  
蒙古乘勝至古北口金兵係居庸不能入蒙古主乃留  
克塔布扎爾等頓兵拒守而自以衆趨紫荆關敗金兵于  
五回嶺拔涿易二州分命扎巴爾將兵反自南口攻居庸  
關破之出古北口與克塔布扎爾軍合既而又選諸部精  
兵五千騎合哥爾台哈斯台二將圍守中都方蒙古兵至皂  
河欲渡高橋呼沙呼病足乘車督戰蒙古兵大敗翊日  
再戰呼沙呼創甚不能出期高琪以亂軍五千拒之高

琪失期不至胡沙虎欲斬之金主以其有功諭令免死  
呼沙呼乃益其兵令出戰戒之曰勝則贖罪不勝斬汝  
高琪出戰自夕至曉北風大作吹石揚沙不能舉目金  
兵大潰高琪自度必為呼沙呼所殺乃以亂軍入中都  
圍呼沙呼之第呼沙呼聞難作登後垣欲走衣絰墜而  
傷股軍士就斬之高琪取其首詣闕請罪金主赦之因  
詔暴呼沙呼之罪奪其官爵以高琪為左副元帥一行  
將士論功行賞時蒙古穆呼哩統兵侵金所向殘破

永清人史秉直聚謀曰方今國家喪亂吾家百口何以自保既而知降者皆得免乃率里中數千人詣涿州軍門降穆呼哩欲用秉直秉直辭乃以其子天倪為萬戶領降人家屬屯霸州 十二月蒙古主留奇爾台及哈斯台

屯燕城北分降人楊伯遇劉林漢軍四十六都統并韃靼兵為三道命其子卓齊特察罕台喀格德依三人為右軍循太行而南破保州中山邢洛磁相衛輝懷孟諸部徑抵黃河大掠平陽太原之間別將布札爾等遵海而東破

濼薊大掠於遼西之地蒙古主自將與子圖類由中道  
破雄漢清滄景獻河間濱棗濟南等郡引兵復自大口  
以逼中都時中原諸路之兵皆僉往山後防遏悉僉鄉  
民為兵工城守禦蒙古盡驅其家屬來攻父子兄弟往  
往遙呼相認由是人無固志故所至郡邑皆下凡破金  
九十餘郡兩河山東數千里人民殺戮幾盡金帛子女  
牛馬羊畜皆席捲而去屋廬焚燬城郭丘墟惟大名真  
定青鄆邳海沃順通州有兵堅守未能破

七年三月蒙古主還自山東屯燕城北諸將請乘勝破  
城蒙古主不從遣使諭金主曰汝河東河北郡縣悉為  
我有汝所守惟燕京耳天既弱汝我復迫汝於險天其  
謂我何我今還軍汝不能犒師以弭我諸將之怒耶丞  
相高琪言於金主曰韃靼入馬疲病當決一戰完顏承  
暉曰不可我軍身在都城家屬各居諸路其心向背未  
可知戰敗必散苟勝亦思妻子而去社稷安危在此一  
舉莫如遣使議和待彼還軍更為之計金主然之遣承

暉議和蒙古主欲得其公主金主乃以其故主永濟之女及金帛童男女各五百馬三千與之夏四月金及蒙古平蒙古主引歸出居庸關金主以蒙古既和大赦其國內五月金主珣以國威兵弱財用匱乏不能守中都乃議遷于汴左丞相圖克坦鎰諫曰鑿與一動北路皆不守矣今已講和聚兵積粟固守京師策之上也南京四面受兵遼東根本之地依山負海其險足恃備禦一面以為後圖策之次也金主不從遂命平章政事都元帥完顏承



暉左丞穆延盡忠奉太子守忠留守中都遂與六宮啟  
行蒙古主聞之怒曰既和而遷是有疑心而不釋憾特  
以解和為致我之計耳復圖南侵金主至良鄉命扈衛  
紇軍元給鎧馬悉復還官紇軍怨之遂作亂殺其主帥  
索袞而推卓達必什呼勒扎拉喇三人為帥北還完顏承  
暉聞變以兵阻盧溝卓達擊敗之遣使乞降于蒙古蒙  
古主遂遣明安援卓達合其兵圍燕京金主聞之遣人  
召太子應奉翰林文字完顏蘇呼以為不可平章珠赫呼

高琪曰主工居此太子宜從且汝能保都城必完乎蘇  
呼曰完固不敢必但太子在彼則聲勢俱重邊隘有守  
則都城無虞昔唐明皇幸蜀太子實在靈武蓋將以繫  
天下之心也不從竟召太子太子既行中都益懼九  
月蒙古將穆呼哩進兵攻金北京守將伊木沁帥衆二十  
萬禦於和託敗還嬰城自守其裨將完顏錫喇高德玉  
等殺伊木沁推音達琿為帥穆呼哩命史天祥等趣兵進  
攻音達琿遂舉城降穆呼哩怒其降緩欲坑之蕭額森

曰北京為遼西重鎮既降而坑之後豈有降者乎穆呼  
哩從之奏音達琿權北京留守以烏葉爾權兵馬帥府  
事於是金順成懿通州相繼降於蒙古

八年二月金中都被圍既久完顏承暉以穆延盡忠  
久在軍旅悉以兵付之而自總持大綱又遣人以檄寫  
奏告急金主命左監軍永錫將中山真定軍左都監烏  
庫哩慶壽將大名軍萬八千西南路步騎萬一千河北  
軍一萬御史中丞李英運糧大名行省富珠哩調遣繼

發以救中都英至大名得兵數萬然馭衆素無紀律三月英被酒與蒙古遇于霸州北大敗盡失所運糧英死士卒殘焉慶壽永錫軍聞之皆潰歸自是中都援絕內外不通承暉與盡忠會議期同死社稷盡忠不從承暉怒即起還第然兵柄既屬盡忠承暉無如之何乃辭家廟召左右司郎中趙思文謂之曰事勢至此惟有一死以報國家耳五月一日承暉作遺表付尚書省令史師安石書之皆論國家大計及平章政事高琪姦狀且謝

不能終保都城之罪從容若平日盡出財物召家人分  
給之舉家號泣承暉神色泰然方與安石舉白引滿謂  
之曰承暉於五經皆經師受謹守而力行之不為虛文  
既被酒取筆與安石訣最後倒寫二字投筆曰遽爾謬  
誤得非神志亂耶謂安石曰子行矣安石出門聞哭聲  
復還問之則已仰藥死矣家人匆匆庭中是日暮凡  
在中都妃嬪聞盡忠將南奔皆束裝至通玄門盡忠給  
之曰我當先出與諸妃啓途諸妃信之盡忠乃與愛妾及

所親者先出城不復反顧蒙古兵遂入中都吏民死者甚衆宮室為亂兵所焚月餘不滅時蒙古主在桓州聞燕陷遣使勞明安等而輦其府庫之實北去於是金祖宗神御及諸妃嬪皆沒焉盡忠行至中山謂所親曰若與諸妃偕來我輩豈得至此安石奉承暉遺表至汴贈尚書令盡忠至金主釋不問仍以爲平章政事

金好之絕

寧宗嘉定四年六月遣金嶸賀金主生辰時金有蒙古

之難不暇延使者至涿州而還 冬十月以金國有難  
命江淮京湖四川制置使謹飭邊備

七年三月金主珣遣使來督歲幣 五月金主珣遷都  
于汴遣使來告 秋七月起居舍人真德秀上疏請罷

金歲幣其畧曰女真以韃靼侵陵徙巢于汴此吾國之  
至憂也蓋韃靼之圖滅女真猶獵師之志在得鹿鹿之  
所走獵必從之既能越三關之阻以致燕豈不能絕黃  
河一帶之水以趨汴使韃靼遂能如劉聰石勒之盜有

中原則疆場相望便為鄰國固非我之利也或如耶律  
德光之不能即安中土則奸雄必將投隙而取之尤非  
我之福也今當乘彼之將亡亟圖自立之策不可幸彼  
之未亡姑為自安之計也夫用忠賢修政事屈羣策收  
衆心者自立之本訓兵戎擇將帥繕城池飭戍守者自  
立之具以忍恥和戎為福以息兵忘戰為常積安邊之  
金繒飾行人之玉帛女真常存則用之女真強敵更生  
則施之強敵此苟安之計也陛下不以自立為規模則



國勢日削人心日偷雖弱小僅存不能無外憂蓋安危存亡皆所自取若夫當事變方興之日而示之以可悔之形是堂上召兵戶內延敵也微臣區區竊所深慮反覆數千言帝納之遂罷金歲幣 八月癸卯金國復來督歲幣

八年十一月復遣使如金賀正且刑部侍郎劉鑰等及太學諸生言其不可不報真德秀復上奏曰金自南邊其勢日蹙韃靼西夏東出潼關深入許鄭攻圍都邑遊

騎布滿山東而金以河南數州之地抗西北方張之師  
加以羣盜縱橫叛者四起危急如此不亡何待臣謹按  
國史女真叛遼在政和甲午其滅遼也在宣和己巳而  
犯中原即于是年之冬今日天下之勢何以異政宣之  
時陛下亦宜以政宣為鑑夫以皇皇鉅宋八葉重光至  
於政宣燕安湛弱之餘紀綱蕩然無一足恃本根既撥  
枝葉從之於是女真得以逞其凶殘攻陷我都城傾覆我  
社稷劫遷我二聖荼毒我蒸民自開闢以來中國之禍

未有若是之酷也臣嘗論政宣起禍之由其失有十旬  
蔡京倡豐亨豫大之說王黼開應奉享上之門專以淫  
侈盡工心奢靡蠹國用土木之功窮極盛麗花石之貢  
毒遍江南甚至內庭曲宴出女樂以娛羣臣大臣入侍  
飾朱粉以供戲笑於是荒嬉無度而朝政大壞矣其失  
一也自童貫高球迭主兵柄教閱訓練之事盡廢上下  
階級之法不行潰敗者不誅而招以金帛死敵者不卹  
而誣以逃亡於是賞罰無章而軍政大壞矣其失二也

政宣之失災異數見火星如月徐徐南行日黯無光洵  
洵欲動赤氛犯斗水冒都城當時羣臣恬不知警方且  
以怪孽為嘉祥變異為休證此工不畏天戒其失三也  
政宣之際以言為諱張根論征斂之煩散官安置李綱  
論大水之變遠謫監征於是薦紳不敢言矣鄧肅以進  
詩諷諫屏出太學朱夢說以冒言宦寺竄斥偏州於是  
布衣不敢言矣鈴結成風馴致禍敗此下不卹人言其  
失四也政宣用事之臣專以毀忠忌賢為事凡累朝老

成之望當代鴻碩之材不以奸黨廢則以邪等斥不以  
曲學取則以異論逐排沮挫摳之餘舉國無君子矣雖  
欲久安得乎其失五也開國承家小人勿用而難壬人  
蠻夷率服政宣之世京黼繼尸宰柄下攸濫廁樞庭其  
翔翔臺省布列館殿非歌頌書生即膏粱子弟非奴事  
閹尹即翼附權臣更引迭援在廷皆小人矣雖欲勿危  
得乎其失六也記曰四方有敗必先知之此之謂民之  
父母政宣小人顯為蒙蔽以欺工聽劉法敗死西陲而

童貫乃以捷聞方臘破東南六郡而王黼匿不以告郭  
藥師反形已露而邊臣掩覆於外女真尅期入伐而大  
臣諱晦于中工下相蒙稔成大患至敵兵濟河而朝廷  
未之覺其失七也書曰民惟邦本本固邦寧政宣小人  
專務聚斂以搖根本朱勔以貢奉擾浙右李彥以括田  
困京東蔡京改鹽鈔法而比屋嘆息王黼創免夫錢而  
諸路騷動人不聊生散為盜賊雖微夷狄亦必有蕭牆  
之憂其失八也詩曰無競惟人四方其訓之古者以一

事寢敵謀片言折外侮政和初遣使覘國而童貫實行  
遼之君臣相顧竊笑已有南朝無人之譏北事既興遂  
付戎律以僕隸之材當元戎之任節制不明諸將無所  
凜畏庸懦不武敵師得以憑陵未幾副之以蔡攸易之  
以譚頴其為駑怯又甚益焉於是女真知中國之無人  
而異志興矣此授任非材其失九也昔子產以蕞爾之  
鄭崎嶇強國間區區一環宜無愛於晉而子產則曰大  
國之人令於小邦而皆獲其求將何以給之一共一否

為罪滋大大國之求無禮以存之何廢之有卒不與秦  
求地於趙趙欲與之虞卿曰王之地有盡而秦之求無  
已以有盡之地而給無已之求其勢必無趙矣趙用其  
計而秦不能加蓋有國者不幸與強敵為鄰當有以服  
其心不當徇其欲方女真欲遼國交雖能每戰輒克然  
視吾中國之尊如高山大海未易測其雄深何敢遽有  
他志不幸奸臣庸夫希功寡謀惟恐無以順適其意彼  
方邀吾歲幣則與以契丹舊數而不辭邀吾燕地稅賦



則予以銀絹百萬而不靳至於索犒師則許以犒師欲  
貸糧則許以貸糧一事方耐而一事已生前請未塞而  
後請復起一切順承無敢或戾而南牧之師已役尋于  
境上矣蓋強鄰窺伺本無厭足徒知徇其欲而無以服  
其心其禍固應爾也或者惟以納張穀結余覲為造釁  
之由而不知召侮取輕其漸非一雖微結納之事其能  
保盟約之不寒乎此處置失宜其失十也今一人憂勤  
恭儉無愧仁祖之風而羣臣盥樂怠傲乃有宣和之習

東南民力耗於軍餉者十八而士卒窮悴常有不飽之  
嗟災異頻仍修省之實未覩言路壅塞諫直之士弗容  
君子非不參用而正論未嘗獲伸小人非不欲遠而讒  
諂猶或得志蒙蔽之風日熾聚斂之政日滋此失未除  
臣恐後之視今猶今視昔也雖然臣外有司也其於內  
事不敢盡言獨請為陛下深陳所以待夷狄者臣觀韃  
靼之在今日無異昔者女真方興之時一旦與吾為鄰  
亦以祖述女真已行之故智蓋女真嘗以燕城歸我矣

今獨不能還我河南之地以觀吾之所處乎受之則享虛名而召實禍不受則彼得以陵寢為辭仗大義以見攻女真嘗與吾通好矣今獨不能卑詞遣使以觀吾之所啟乎從之則要索無厭豈能滿其溪壑之欲不從則彼得藉口以開釁端臣揣其情必出於此不可不預圖以應之也昔五季之亂江左粗安者以羣醜並爭莫能相一故吾得以偷旦夕之安及苻堅既滅慕容旋啟吞晉之謀元魏已併諸國遂萌飲江之志今新國方張盡有河

朔揚劉羣盜人皆服從臣恐五季角立之勢殊未可為  
江左苟安之計也昔孫氏以區區之吳能當強大之魏  
者其君臣能相與策勵也今國家幅員萬里帶甲百萬  
江漢為池豈下於吳陛下任九廟之託固不可付安危  
於度外養成深患也因以五不可為獻一日宗社之恥  
不可忘言國家之於金人蓋萬世必報之讐高宗孝宗  
值其方強不得已以太王自處而以勾踐望後人今天  
亡彼國近在朝夕誠能以待敵之禮而遇天下之豪傑

以遺敵之費而厲天下之甲兵人心奮張士氣自倍何  
憚於此時而猶事之哉且重於絕金者畏名怨而啓釁也  
然能不名怨於亡金而不能不啟釁於新敵權其利害  
孰重孰輕臣願陛下勉勾踐之良圖懲謝玄之失策則  
王業興隆可冀也二曰比鄰之盜不可輕言韃靼及山  
東之盜苟得志而鄰於吾莫大之憂也願朝廷毋輕二  
賊日夜講攻守之策以逆杜窺覷之心三曰幸安之  
謀不可恃言今之議者大抵以金人之存亡為我欣戚

聞危感之報則冀其非實得安靜之耗則幸其必然是猶以朽壤為垣而望其能障盜賊也願陛下勵自強之志恢立武之經毋以敵存為喜敵亡為畏則大勢舉矣四曰導諛之言不可聽言今邊事方殷正君臣戒懼之日而縉紳大夫工為諛說或以五福足恃為言天乾象吝愆適日尤甚其可恃讖緯不經之說而忽昭昭之儆戒乎惟陛下監天人之相因察諛佞之有害並修其本以格天休宗社之慶也五曰至公之論不可忽言公論

國之元氣也元氣痞鬲不可以為人公論堙鬱不可以  
為國深惟今日實公論屈伸之機朝廷之工若以言者  
為愛君為報國無猜忌之意而有聽用之誠則公論自  
此愈伸若以言者為沮事為微名無聽用之誠而有猜  
忌之意則公論自此復屈夫公論屈伸乃治亂存亡之  
所由分故臣於篇終反覆極言惟陛下亮臣愚忠也不  
報

十年二月陳伯震還自金金主謂之曰聞息州南境有

盜此乃彼界饑民沿淮為亂耳宋人何故攻我蓋欲以  
為用兵之端也 夏四月金人分道入寇初金有王世  
安者獻取盱眙楚州之策金主以為淮南招撫使遂有  
南侵之謀珠赫呼高琪復勸金主侵宋以廣疆土金主始  
猶不然至是命烏庫哩慶壽完顏薩布帥師南侵遂渡  
淮犯光州中渡鎮執權場官盛允升殺之慶壽分兵犯  
樊城圍棗陽光化軍別遣完顏阿林入大散關以攻西  
和階成州朝廷聞之詔京湖江淮四川置制使趙方李



珏董居誼俱便宜行事以禦之先是金右司諫許古上  
疏請遣使與宋議和則韃靼聞之亦將斂迹不宜用兵  
以益敵金主即命古草議和牒文既成示參政高汝礪  
汝礪言有哀祈之意徒示微弱無足取者議遂寢平章  
政事胥鼎亦切諫南侵有六不可高琪不從金主以南  
北用兵西夏復擾財匱兵弱為憂集百官議守禦之策  
高琪心忌之有所言皆不用 五月金人犯襄陽趙方  
語其子范葵曰朝廷和戰未定觀此益亂人意吾策決

矣惟有提兵臨邊決戰以報國耳遂抗疏主戰因親往襄陽檄扈再興陳祥鈴轄孟宗政等禦之仍增戍光化信陽均州以聯聲勢金人來自團山勢如風雨再興等分三陣設伏以待既至再興佯卻金人逐之宗政與祥合左右兩翼掩擊之金人三面受敵大敗血肉枕藉山谷間尋報棗陽圍急宗政午發峴山遲明抵棗陽馳突如神金人大駭宵遁方聞捷大喜以宗政權知棗陽軍未幾京湖將王辛劉世興亦敗金兵於光山隨州金人

乃去 六月趙方請以伐金詔天下乃下詔畧曰朕勵  
精更化一意息民金人跨我中原者久矣彼既失其故  
土又競爭之豈不知機會可乘讐恥未復念甫申於信  
誓實重起於兵端若能立非常之勲則亦有不次之賞  
遂傳檄詔諭中外官吏軍民 十二月金完顏贊以步  
騎萬人犯四川破天水軍守臣黃炎孫遁金人攻白環  
堡破之統制劉雄棄大散關遁

十一年二月甲辰金人焚大散關復破皂郊死者五萬

人 戊辰金人圍隨州棗陽軍孟宗政權棗陽初親事  
一愛僕犯新令立斬之軍民股栗於是築堤積水修治  
城堞簡閱軍士完顏薩布擁步騎圍城宗政與扈再興  
合兵角敵歷三月大小七十餘戰宗政身先士卒金人  
戰輒敗忿甚周城開濠控兵列濠外飛鋒鏑以絢鈴自  
警鈴響則犬吠宗政厚募壯士乘間突擊金人不能支  
盛兵薄城宗政隨方力拒隨州守許國援師至白水鼓  
聲相聞宗政率諸將出戰金人奔潰 三月利州統制

王逸帥官軍及忠義人十萬復大散關及皂郊堡追斬  
金統軍完顏贊進攻秦州至赤谷口沔州都統劉昌祖  
命退師且放散忠義人軍遂大潰 夏四月金兵合長  
安鳳翔之衆復攻皂郊遂趨西和州劉昌祖焚城遁還  
時西和守臣楊克家成州守臣羅仲甲階州守臣侯頤  
以昌祖遁棄城走金兵遂入諸州前後獲糧九萬斛錢  
數千萬軍實不可勝計復犯大散關守將王立亦遁又  
犯黃牛堡興元都統吳政拒却之政至大散關執立斬

之以徇事聞政進三官昌祖奪官竄韶州克家等並竄

遼州 十二月金主欲乘勝來議和以開封府治中呂

子羽為詳問使至淮中流不納迺去由是和好遂絕金

主以布薩安貞為左副元帥輔太子守緒會師南侵

十二年春正月辛卯金復寇西和州守將趙彥呐設伏

待之殲其衆乃還 乙未興元都統吳政及金人戰于

黃牛堡死之 二月癸卯金人乘勝攻武林關都統李

賁遁還 丁未金人破興元府權府趙希音棄城走

壬子四川制置使董居誼遁都統張威使石宣邀擊金人于大安軍大破之殲其精兵三千人俘其將巴圖魯安金人乃遁去 金完顏鄂和復大舉圍棗陽擊其外繞以土城趙方計其空窠穴而來若擣其虛則棗陽之圍自解乃命知隨州許國及扈再興引兵三萬餘分二道出攻唐鄧二州又命其子范監軍葵為後殿 閏三月癸亥金人圍安豐軍及滁濠光三州江淮制置使李珣命巴州都統制武師道忠義軍都統制陳孝忠救之

皆不克進金人遂分兵自光州犯黃州之麻城自濠州  
犯和州之石碛自盱胎犯滁州之全椒來安及揚州之  
天真真州之六合淮南流民渡江避亂諸城悉閉金遊  
騎數百至采石楊林渡建康大震時賈涉以淮東提刑  
知楚州節制京東忠義慮忠義人兵為金所用乃遣陳孝  
忠向滁州石珪夏全時青向濠州季先葛平楊德廣趙  
滌濠季全李福要其歸路季全進至渦口與金左都監  
赫舍哩要赫德駙馬阿哈連戰于化湖陂殺金將數人



得其金牌金人乃解諸州之圍而去全追擊之復敗之  
于曹家莊而還金人自是不敢窺淮東初賈涉募能殺  
金太子者賞節度使殺觀王者賞承宣使殺駙馬者賞  
觀察使李全因致所得金牌于涉云殺駙馬阿哈所獲  
者涉請于朝乞如約投賞遂授全廣州觀察使而阿哈  
實不死也 秋七月孟宗政扈再興合擊金人于棗陽  
時金帥完顏鄂和擁步騎傅城宗政囊隸盛沙以覆樓  
棚列甕澗水以隄火募砲手擊之一砲輒殺數人金人

選精騎二千號弩手擁雲梯天橋先登又募鑿銀鑛石  
工晝夜攻城運葭葦直抵園樓下欲焚樓宗政先燬樓  
掘深坑防地道叔戰棚防城墮穿窬才透即施毒煙烈火  
鼓鞀以薰之金人室以濕氈折路以剝土城頽樓陷宗  
政撤樓益薪架火山以絕其路列勇士以長箛助弩備  
其衝距樓陷所數丈築堰月城翼傅正城金人搗強兵  
披厚鎧矚矜鐵面而前又濕氈濡草蒙火山擁雲梯徑  
抵西北園樓登城城中軍以長戈舂其喉殺之敢勇軍

自下夾擊金兵陸死燎焰金人連不得志會扈再興許  
國兩道並進掠唐鄧境焚其城柵糧儲金頓兵棗陽城  
下八十餘日趙方知其氣已竭乃召國再興還併東師隸  
於再興剋期合戰再興敗金人于漢河又敗之城南宗  
政自城出擊內外合勢士氣大振賈勇入金營自晡至  
三更殺其衆三萬金人大潰鄂和單騎遁獲其貲糧器  
甲不可勝計追金人至馬磴寨焚其城入鄧州而還金  
人自是不敢窺襄漢棗陽中原道民來歸以萬數宗政

發廩贍之給田葺屋與居籍其勇壯號忠順軍俾出沒唐鄧間宗政由是威振境外金人呼為孟爺爺冬十月己丑京湖制置使趙方以金人屢敗必將同時並攻當先發以制之乃遣扈再興許國孟宗政帥師六萬分三道伐金戒之曰毋深入毋攻城第潰其保甲燬其城若空其資糧而已

十三年春正月丁酉扈再興攻鄧州許國攻唐州皆不克而還金人追之遂攻樊城趙方督諸州拒退之孟宗

政復敗金人于湖陽 八月安丙遣夏人書定議夾攻

金人以夏兵野戰我師攻城遂命利州統制王任信帥師赴熙秦鞏鳳翔委丁煇節制且傳檄招諭陝西五路官吏軍民初夏人與金連和八十餘年未嘗交兵及為蒙古所攻求救于金金人不能出兵夏人怨之和好遂絕 九月辛卯夏人遣其樞密使寧子寧帥眾二十萬圍鞏州且來趣兵王任信帥師發宕昌是月安丙命諸將分道進兵統制質俊李實發下城都統制張威出天

水程信出長道陳立出大散關田冒出子午谷陳昱出  
上津庚子質俊等克來遠鎮敗金人于定邊城辛丑王  
仕信克鹽川鎮乙巳會夏人於鞏州城下攻城不克遂  
趨秦州丙辰夏人自安遠砦退師冬十月丁巳程信  
復邀夏人共攻秦州夏人不從遂自伏羌城引兵還諸  
將皆罷兵安丙命信斬王仕信于西和罷張威官

十四年二月戊辰金人圍光州己巳金人犯五關壬申  
金人圍黃州又遣將圍漢陽軍三月丙戌鄂州副都

統扈再興引兵攻唐州 金人圍黃州急詔馮椅援蘄  
黃遷延不進黃州守何大節取郡印佩之誓以死守一  
夕與兵忽奔告曰城陷矣擁之登車纔出門而敵兵已  
集大節竟自沉於江而死金人復陷蘄州知州事李誠  
之自殺家屬皆赴水死 癸丑金兵退扈再興邀擊於  
天長敗之 夏四月戊辰金人渡淮北去李全遣兵邀  
擊又大敗之 冬十月夏人復乞會師伐金

十五年夏四月金主以朝廷絕歲幣國用以困乃命元

帥左都監鄂和行元帥府事節制三路軍馬同僉書樞  
密院事時全副之由穎壽進渡淮敗官軍於高塘市及  
固始縣破廬州將焦思忠兵既而獲生口言時全之侄  
青受宋詔與全兵相距全匿其事五月鄂和引還距淮  
二十里諸軍將渡全矯稱密詔諸軍且留收淮南麥遂  
下令人獲三石以給軍衆惑之留三日鄂和謂全曰今  
淮水淺狹可以速濟若值暴漲宋乘其後將不得完歸  
矣全力拒之是夕大雨明日淮水暴漲乃為橋渡軍官



軍襲之全兵大敗橋壞全以輕舟先濟士卒皆覆沒全之兵財由是大竭金主詔數全罪而誅之

十七年三月金主遣尚書令史季唐英至滁州通好既而復遣樞密判官伊喇豐阿拉率兵至光州榜諭軍民更不南侵

### 李全之亂

寧宗嘉定四年十一月金益都楊安兒兵起初益都人楊安國少無賴以鬻鞍材為業市人呼為楊鞍兒遂自

自名楊安兒金泰和中南侵山東無賴往往相聚剽掠  
命州縣招捕之安兒時為羣盜亦請降隸名軍中累官  
至防禦使及蒙古兵薄中都金人招鐵瓦敢戰軍得千  
餘人以唐古哈達為都統安兒副之以戍邊安兒至鷄  
鳴山不進亡歸山東與張汝楫聚黨攻劫州縣殺掠官  
吏山東大擾

七年十二月金濰州李全兵起金濰州北海農家子銳  
頭蓋目權譎善下人弓馬趨捷能運鐵鎗人號李鐵鎗

開禧中戚拱嘗結之以復漣水金主遷汴賦歛益橫河  
北山東遺民保若阻險羣聚為盜寇掠州郡皆衣紅袖  
襖以相識時目為紅襖賊全與仲凡福亦聚眾數千鈔  
掠山東劉慶福國安用鄭行德田四于洋于渾等皆附  
之

八年二月金布薩安貞敗楊安兒於益都安兒奔登州  
刺史耿格納之安兒遂僭號置官屬改元天順眾數十  
萬安貞復與山東行省完顏寔經歷黃國等將花帽軍

討敗之殲其衆安兒乘舟入海走岨嶠山舟人曲成等擊之安兒墜水死無子其妹四娘子狡悍善騎射劊全收餘黨奉之稱曰姑姑衆尚萬餘掠食至磨旗山李全以其衆附之楊氏因與私通遂以為夫安貞復遣小爾佳錫爾格破劊二祖斬之餘黨稱霍儀為帥彭義斌石珪夏全時青裴淵葛平楊德廣王顯忠附焉

十年秋七月知楚州應純之以山東羣盜來歸置忠義軍時李全等出沒島嶼竇貨山積而不得食相率食

人會鎮江武鋒卒沈鐸亡命山陽誘致米商獲利數十

倍應純之償以玉貨北人至者輒舍之鐸因說純之以

歸銅錢為名弛渡淮之禁由是來者莫可遏初楊安兒

之未敗有意歸朝定遠民季先者大俠劉佑家廝養也

常隨佑部綱客山陽楊安兒見而悅之處以軍職安兒

死先至山陽黃綠鐸得見純之道山東豪傑願歸正之

意純之命先為譏察諭意群豪以鐸為武鋒副將與高

忠政各集忠義民兵分二道伐金先遂以兵五千人附

忠皎忠皎與合兵攻海州糧援不繼退屯東海純之見  
北軍屢捷密聞于朝謂中原可復時瀕歲小稔朝野無  
事丞相史彌遠鑿開禧之事不明招納密敕純之慰接  
之號忠義軍就聽節制給忠義糧於是東海馬良高林  
宋德珍等萬人輻輳連水李全等生羨心焉 十一月  
李全及其兄福襲金青莒州取之

十一年春正月壬午李全率眾來歸詔以全為京東路  
總管 五月金石州賊馮天羽敗死其黨國安用來降

詔以安用同知孟州事

十二年九月以賈涉主管淮東制置司節制京東河北  
軍馬初山東來歸者日衆而石珪以計殺沈鐸於連水  
應純之亦罷去權楚州梁丙無以贍之季先乞預借兩  
月糧然後率所部五千併馬良等萬人往密州就食丙  
不許季全代領其衆丙亦不從而以石珪權軍務珪乃  
奪運糧之舟渡淮大掠至楚州南渡門焚燬幾盡丙遣人  
諭之不止時涉知盱眙軍上書言忠義之人源源而來

不立定額自為一軍處之北岸則安能以有限之財應  
無窮之需餓則噬人飽則用命其勢然也朝廷因命涉  
節制忠義人兵涉受命即遣傅翼諭石珪楊德廣以逆  
順禍福珪等乃謝罪涉慮其人衆思亂因滁濠之役分  
石珪陳孝忠夏全為兩屯李全為五塔又用陝西義勇  
法湮其手合諸軍汰者三萬有奇湮者不滿六萬人正  
軍常屯七萬使主勝客朝廷歲省費十三四至是分江  
淮為三司乃命涉管淮東是月金張林以山東諸郡附



李全來歸初蒙古克益都不守而去益都府卒張林與其黨復立府歸金以功為治中先險不逞知府田琢在山東徵求過當失衆心林率其黨逐之琢戰敗乃還汴林遂據益都山東諸郡皆附之林欲歸附以自固而未決會李全自齊州還揣知林意乃薄兵青州城下遣人陳說國家威德勸林早附林恐全誘己猶豫未納全挺身入城惟數人從林乃開門納之相見甚驩謂得所托置酒結為兄弟全既得林要領附表奉青莒密登萊濰

淄濱棣寧海濟南十二郡版籍來歸表辭有云舉七十  
城之全齊歸三百年之舊主詔授林武翼大夫安撫使  
兼京東總管 十二月李全襲泗州不克而還時大雨  
雪淮冰合請于賈涉曰每恨泗州阻水今如平地矣請  
取東西城自效涉許之全以長槍三千人從夜半渡淮  
潛向泗之東城將踏濠水得城下掩金人不備俄城上  
發炬數百齊舉遥謂全曰賊李三汝欲偷城耶天黑故  
特燭之全知有備乃引兵還

十三年六月壬午賈涉誘殺連水忠義軍副都統季先  
其下推石珪為帥以拒涉初季全自化湖陂之捷有輕  
諸將心以季先威望出己工陰結賈涉所任使吳覲使  
諧先欲反涉信之乃以計命先赴樞密院議事於道殺  
之而遣統制陳選總先衆於連水先部曲裴淵宋德珍  
孫武正王義深張山張友六人拒選不納而潛迎石珪  
于盱眙奉為統帥珪道楚城涉不之覺遂入連水選還  
涉恥之謀分珪軍為六請于朝出修武京東路鈐轄印

詔各六授淵等以分統先衆淵等陽從命而實不奉涉  
教令涉恐甚詔以珪為漣水忠義軍統轄 八月金長  
清縣令嚴實為主將所疑挈家壁于清崖岵依益都張  
林以避之會趙拱以朝命諭京東過清崖實因求內附  
實涉以聞實亦分兵四出所至州縣皆下於是太行之  
東皆受實節制實乃舉魏博思德懷衛開相等郡來歸  
涉因再遣拱往諭配以兵二千李全乃請往涉不能止  
乃帥楚州及盱眙忠義萬人以行拱說全曰將軍提兵

渡河不用而歸非示武也今乘勝取東平可乎全乃合  
張林軍得數萬襲東平之城南金行省呼爾噶帥師固  
守全與林夾汶水而砮明日金監軍王庭玉以騎兵三  
百奄至全欣然工馬帥帳前所有騎赴之殺數人奪其  
馬迤北抵山谷遇金將鄂博台盛兵出旁有繡旗女將  
馳槍突鬪全幾不免會諸將赴救拔全以出乃退保長  
清精銳喪失大半全恐所攜鎮江軍五百人懷憤乃使  
拱先將之以歸而自以餘衆道滄州假鹽利慰贍之尋

還楚州 張林攻金滄州王福以城降 冬十月金以

時青為濟州宣撫使初青與叔父全俱為紅襖賊及楊  
安兒劉二祖敗青承赦為濟州義軍萬戶後附李全來  
歸處之龜山有衆數萬至是金帥府遣人招之青以書  
乞假邳州以屯老幼當襲取盱眙盡定淮南以贖罪金  
主乃有是命未幾青復自金來附以為京東鈐轄 十  
二月漣水忠義軍統轄石珪自以入漣水非賈涉本意  
心懷不安李全復請討珪於涉涉遂以全所統衆列於

楚州之南渡門而移淮陰戰艦於淮安以示珪有備因  
命一將招珪軍來者增錢糧不至者罷支給衆心遂散  
珪枝窮乃殺裴淵而挾孫武正宋德珍降于蒙古珪既  
去漣水之衆未有所屬李全求併將之涉不能却遂以  
付全

十四年春正月以李全還自山東賜緡錢六萬時青入  
泗州西城二月金人來救青敗乃還 十一月京東安  
撫張林叛降于蒙古先是李全既併將漣水忠義益驕

悍輕朝廷及遊金山作佛事以薦國殤知鎮江府喬行  
簡方舟逆全大合樂以享之全歸語其徒曰江南佳麗  
無比須與若等一到始造舩艇舟謀爭舟楫之利膠西  
當登寧海之衝百貨輻輳全使其兄福守之為窟宅計  
時互市始通北人猶重南貨價增十倍全誘商人至山  
陽以舟浮其貨而中分之自淮轉海達於膠西福又具  
車輦之而稅其半乃聽往諸郡貿易車夫皆督辦於張  
林林不能堪林財計仰六鹽場福恃弟有恩於林欲分



其半林許福恣取鹽而不分場福怒曰若悖恩耶待與  
都統提軍取若頭耳林懼其黨李馬兒說林歸蒙古林  
遂以京東諸郡降於蒙古將穆呼哩福狼狽走還楚州  
林猶貽賈涉書言非已叛實由李福也

十五年二月李全復泗州 夏四月知濟南府种贇討  
張林林敗走李全入青州據之 十二月以李全為保  
寧軍節度使京東路鎮撫副使初全有戰功史彌遠欲  
加全官賈涉止之及加節鉞涉嘆曰朝廷但知官爵可

以得其心寧知驕則將至於不可勸耶

十六年六月淮東制置使賈涉以李全驕暴難置力請  
還朝在道卒初涉欲制忠義兵乃以翟朝宗統鎮江副  
司八千人屯楚州城中又分帳前忠義萬人命趙邦永  
高友統五千屯城西王暉于潭統五千屯淮陰李全輕  
鎮江兵而忌帳前忠義乃數稱高友等勇過出軍必請  
以自隨涉不許全每宴麾下併召涉帳前將校於是帳  
前亦願隸全然未能合也及涉卒丘壽邁攝帥事全請

曰忠義烏合尺籍鹵莽莫若別置新籍一納諸朝一申制閩一留全所庶功過有考請給無弊壽邁從之全乃合帳前忠義與己軍盡籍之而併統其軍壽邁不悟

八月李全攻邳州不克復還青州 十二月以許國為

淮東制置使初國為淮西都統奉祠家居欲傾賈涉而代之數言李全必反涉卒會召國入對國疏全奸謀益深反狀已著非有豪傑不能消弭蓋自鬻也遂易國文階為淮東安撫制置使兼知楚州命下聞者驚愕淮東

參幕徐晞殺雅意開闔及聞國用乃註釋國疏以寄全  
全不樂

理宗寶慶元年十二月州軍作亂初許國至鎮李全妻  
楊氏郊迎國辭不見楊氏慙而歸國既視事痛抑北軍  
有與南軍競者無曲直偏坐之犒賞十損八九全自青  
州致書于國國誇於衆曰全仰我養育我略示威即奔  
走不暇矣全故留青州國不能致乃數致厚餽邀全還  
劉慶福亦使人覘國意向國左右語覘者曰制置無害

汝等意慶福以報全全集將校曰我不參制閫則曲在  
我今不計生死必往遂還楚州上謁宿贊戒全曰節使  
當庭參制使必免禮及庭趨國端坐納全拜不為止全  
退怒曰全歸本朝拜人多矣但恨汝非文臣本與我等  
汝向以淮西都統謁賈制帥亦免汝拜汝有何勲業一  
朝位我上使不相假借耶全赤心報朝廷不反也國繼  
設盛會宴全遺勞加厚全終不樂慶福謁國之幕客章  
夢先夢先令隔幕駝喏慶福亦怒既而全欲往青州恐

國哥留自計曰彼所爭者拜耳拜而得志吾何愛也更折節為禮因會集間出劄白事國見其細教判從之全即席再拜謝自是動息必請得請必拜國大喜語家人曰吾折服此虜矣全往青州國集兩淮馬步軍十三萬大閱楚城外以挫北人之心楊氏及軍校留者懼其謀已內自為備後全遣慶福還楚為亂適湖州潘壬事敗全黨益不安或教楊氏畜一妾男子指謂人曰此宗室也且語僚佐曰會令汝為朝士潛約肝胎四將為應肝

貽四將不從於是慶福謀中輟止欲快意於國計議官  
苟夢玉知之以告國國曰但使反反即殺之我豈文儒  
不知兵者耶夢玉懼禍及求檄往盱貽復告慶福曰制  
使欲圖汝兩為自結之計及是國晨起視事忽露刃充  
庭客駭走國厲聲曰不得無禮矢已及顙流血被面而  
走亂兵悉害其家人縱火焚官寺兩司蓄積盡為賊有  
親兵數十人翼國登城樓縋城走伏道堂中宿焉賊擁  
通判姚紳入城犒兩軍使歸營是日慶福首殺夢先以

報其辱明日國璉于途事聞史彌遠懼激他變欲事含  
忍以徐晞稷嘗倖楚守海得全歡心乃授晞稷為制置  
使令屈意撫全全自青州還楚倂責慶福不能彈壓致  
忠義之閔斬數人上表待罪朝廷不問知揚州趙范得  
制置印于潰卒中以授晞稷晞稷至楚全及門下馬拜  
庭下晞稷降等止之賊衆乃悅晞稷至以恩府稱全思  
堂稱楊氏而手足倒置矣 五月李全牒彭義斌于山  
東曰許國誅反已伏誅矣爾軍並聽我節制義斌大罵



曰逆賊背國厚恩擅殺制使我必報此仇乃斬齊牒人  
南向告天誓衆見者憤激於是全自青州攻東平不克  
乃攻恩州義斌出兵與戰全敗走獲其馬二千劉慶福  
引兵救全又敗全退係山峒抽山陽忠義以北楊氏及  
劉全皆欲親赴難會全遣人求徐晞稷書與義斌連和  
乃止義斌致書沿江制置使趙善湘曰不誅逆全恢復  
不成但能遣兵扼淮進據漣海以感之斷其南路此賊  
必擒賊平之後復一京三府然後義斌戰河北盱眙諸

將襄陽騎士戰河南神州可復也盱眙四總管亦各遣使致書乞助討賊知揚州趙范亦以為言史彌遠令諭范無出位專兵各享安靖之福范復以書力論之曰今工自一人下至公卿百執事又下至士民軍吏無不知禍賊必反雖先生之心亦自知其必反也衆人知之則言之先生知而獨不言不言誠是也內無卧薪嘗膽之志外無戰勝攻取之備先生隱忍不言而徐思所以制之此廟謨所以為高也然以撫定責之歸授而

以鎮守責之范責睇稷者函人之事也責范者矢人之事也既責范以惟恐不傷人之事又禁其為傷人之痛惡其為傷人之言何哉賊見范為備則必忌而不得以肆其奸他日必將指范為首禍激變之人劫朝廷以去范先生始末之信左右曰可御大夫曰可先生必將曰是何惜一趙范而不以紓禍哉必將縛范以授賊而范遂為宋晁錯雖然使以范授賊而果足以紓國禍范死何害哉諺曰護家之狗盜賊所惡故盜賊見有護家之

狗必將指斥於主人使先去之然後肆穿窬之姦而無所忌然則殺犬固無益於彌盜也欲望矜憐別與聞慢差遣彌遠不聽 六月彭義斌既克山東復納李全降兵兵勢大振遂圍東平嚴實潛約蒙古將博勒和合兵攻之兵久不至城中食盡乃與義斌連和義斌亦欲藉實取河朔而後圖之遂以兄禮事實時實衆尚數千義斌不之奪而留所掠實青崖之家屬不遣 秋七月彭義斌下真定道西山與博勒和等軍相望義斌分嚴實

帳下兵陽助而陰伺之實知勢迫即赴博勒和軍與之  
合遂及義斌戰於內廣之五馬山義斌兵潰史天澤以  
銳卒略其後遂擒義斌說之降義斌厲聲曰我大宋臣  
義豈為他臣屬耶遂死之於是京東州縣復為實有

二年六月蒙古圍李全于青州全北剽山東南仰錢糧  
且換朝廷以疑蒙古蒙古攻之全大小百戰終不利嬰  
城自守蒙古築長圍夜布狗砦全糧援路絕與兄福謀  
福曰二人俱死無益也汝身係南北輕重我當死守孤

城汝間道南歸提兵赴援可尋生路全曰數十萬勦敵未易支也全朝出城夕陷於是全留青福還楚 九月徐晞稷罷以劉瑋為淮東制置使朝廷聞李全為蒙古所圍稍欲圖之以晞稷畏懦謀易帥劉瑋雅意建閩使鎮江副都統彭忬延譽忬亦垂涎代瑋從吏尤力故以瑋代晞稷忬代瑋知盱眙 十一月劉瑋至楚州心知不能制盱眙四總管惟以鎮江兵三萬自隨夏全請從瑋素畏其狡不許彭忬自以資望視瑋更淺曰瑋止夏

全是欲遺患盱眙瑋猶憚夏全我何能用乃激夏全曰  
楚城賊黨不滿三千健將又在山東劉制使圖之收功  
在旦夕太尉何不往赴事會夏全忻然帥兵徑入楚城  
時青亦自淮陰入屯城內瑋駭懼勢不容却復就二人  
謀焉時傳李全已死李福欲分兵赴青州瑋令夏全盛  
陳兵楚城李全之黨震恐李全妻楊氏使人行成于夏  
全曰將軍非山東歸附耶狐死兔悲李氏滅夏氏寧獨  
存願將軍垂盼全諾楊氏盛飾出迎與按行營壘曰人

傅三哥死吾一婦人安能自立便當事太尉為夫子女  
玉帛干戈倉廩皆太尉有望即領此無多言也夏全心  
動乃置酒歡甚飲酣就寢如歸轉仇為好反與福謀逐  
瑋遂圍楚州治焚官民舍殺守藏吏取貨物時瑋精兵  
尚萬人窘束不能發一令太息而已夜半瑋縋城僅以  
身免鎮江軍與賊戰死者大半將校多死鎧甲錢粟悉  
為賊有瑋步至揚州借兵自衛夏全既逐瑋暮歸李全  
營楊氏拒之全恐楊氏圖已因大掠趨盱眙欲為亂盱



胎將張惠范成進閉城門夏全不得入狼狽降金朝廷  
聞之大恐璋自刎未幾死

三年春正月以姚弼為淮東制置使朝廷以弼嘗與李  
全交歡致命之弼朝辭帝謂曰南北皆吾赤子何分彼  
此卿其為朕撫定之弼至楚城東艤舟以治事間入城  
見李全妻楊氏用徐晞稷故事而禮過之楊氏許弼入  
城弼乃入寄治僧寺中極意娛之 三月趙范工書史  
彌遠曰淮東之事日異日新然有淮則有江無淮則長

江以北港汊蘆葦之處敵人皆可潛師以濟江面數千里何從而防哉今或謂異辭厚惠可以啗賊而不知陷彼款兵之計或謂歛兵退屯可以緩賊而不知成彼深入之謀或欲行清野以嬰城或欲聚為合而浪戰或以賊詞之乍順乍逆而為喜懼或以賊兵之乍進乍退而為寬緊皆失策也失策則失淮失淮則失江而其失有不勝悔者矣夫有遏寇之兵有遊擊之兵有討賊之兵今竇應之逼山陽天長之逼盱眙各增戍兵萬人遣

良將統之賊來則堅壁以挫其鋒不來則耀武以壓其境而又觀釁伺隙時遣偏師掩其不備以示敢戰使雖欲深入而畏吾之擣其虛此遏寇之兵也盱眙之寇素無儲蓄金人亦無以養之不過分兵擄掠而食當量出精兵授以勇技募土豪出奇設伏以勦殺之此遊擊之兵也維揚金陵合肥各聚二三萬人人物必精將校必勇器械必利教閱必熟紀律必嚴賞罰必公其心術念慮必人人思親其上而死其長信能行此半年而可以

強國一年而可以討賊矣賊既不能深入擄掠復無所  
獲而又懷見討之恐則必反而求贍於金金無餘力及  
此則必怨之怒之吾於是可以嫁禍於金人矣或謂揚  
州不可屯重兵恐速賊禍是不然揚州者國之北門一  
以統淮一以蔽江一以守運河豈可無備哉善守者敵  
不知所攻今若設寶應天長二屯以扼其衝復重二三  
帥闔以張軍勢賊將不知所攻而敢犯我揚州哉設使  
賊不知兵勢而犯揚州是送死矣朝廷乃召范粟議復

令知池州 五月李全以青州降蒙古全被圍一年食  
牛馬及人且盡將自食其軍全欲降懼衆異議乃焚香  
南向再拜欲自經而使其黨鄭衍德田四救已曰譬如  
為未有身愁無袖耶今北歸未必非福全乃降蒙古  
劉慶福在山陽自知己為厲階懷不自安欲圖李福以  
贖罪于朝李福知之乃謀殺慶福於是二人互相猜忌  
不復相見一日李福偽稱疾不出旬餘慶福往候之李  
福乃躍起拔刀傷慶福慶福走左右殺之李福以慶福

首納于姚弼弼大喜幕客杜來曰慶福首禍一世奸雄  
今頭落措大手即時楚州自夏全之亂儲積無餘綱運  
不續賊黨籍籍謂福所致福畏衆口數見弼促之弼謝  
以朝廷撥降未下六月福乘衆怒與李全妻楊氏謀召  
弼飲弼至而楊氏不出就坐賓次左右散去福以命召  
諸幕客以楊氏命名弼二妾諸幕客知有變不得已而往  
杜來至八字橋福兵腰斬之福兵欲害弼鄭行德救之  
得免去鬚鬢綻城夜走歸明州死朝廷以淮亂相仍遣

帥必覓姑欲輕淮而重江楚州不復達閩就以其帥楊  
紹雲兼制置改楚州為淮安軍命通判張國明權守視  
之若霸廩州然 秋七月張林等歸淮安討李福斬之  
初李全之黨以贖軍錢糧不繼屢有怨言全將安國用  
閩通款曰我曹未外日受銅錢二百楚州物賤可以樂  
生而劉慶福為不善怨仇相尋使我曹無所衣食時張林  
邢德亦在楚自謂嘗受朝廷恩中遭全閩貳今歸于此  
豈可不與朝廷立事王義深嘗為全所辱且謂我本賈

帥帳前人與彭義斌舉義不成而歸五人相謂曰朝廷

不降錢糧為有反者未除耳乃共議殺李福及全妻楊

氏以獻逆帥眾趨楊氏家福走出邢德手刃之相屠者

數百人有郭統制者殺全次子通及全妾劉氏妾稱楊

氏函其首并福首獻于楊紹雲雲馳送臨安傾朝皆喜

八月檄知盱眙軍彭牝及總管張惠范成進時青併

兵往楚州使便宜盡戮李全餘黨牝輕保不為惠等所

服得檄不敢自決請制府及朝廷處之朝議以時青望



重檄青區畫青恐禍及密遣人報全於青州遷延  
不決惠成進以朝檄專委青而不及已乃歸盱眙設燕  
邀悅乘其醉縛之渡淮以盱眙降于金 李全得時青  
報慟哭力告蒙古大將求南還不許全因斷一指以示  
之誓還南必叛蒙古大將乃承制授全山東淮南行省  
得專制山東歲獻金幣全遂與蒙古張宣差及通事數  
人還楚州服蒙古衣冠文移紀甲子而無年號楊紹雲  
聞其至遂留揚州不還王義深奔金國安用殺張林邢

德以自贖郭統制亦為全所殺 十二月全封李全為淮南王全不受時全敗完顏鄂和于龜山故也 李全誘殺時青併其眾

紹定三年二月起復趙范趙葵節制鎮江滁州軍馬

五月以李全為彰化保康節度使京東鎮撫使全不受命初全自還楚即厚募人為兵不限南北天長民保聚為十六砦比歲失業官賑不繼壯者亦皆就募射陽湖浮居者數萬家家有兵仗侵掠難制其豪周安民谷汝

礪王十五長之亦盡結水砦以觀成敗全知東南利舟  
楫謀習水戰米商至悉併舟糴之留其舵工以一教十  
又遣人泛江湖市桐油黏筏募南匠大治舳舻船自淮  
口及海相望時時試舟于射陽湖及海洋復以糧少為  
辭遣海舟自蘇州洋入平江嘉興實欲習海道以覘畿  
甸然以山東經理未定而歲貢蒙古者不可缺故外恭  
順朝廷以就錢糧因以貨貨輸蒙古朝廷亦以全往來  
山東得以少寬北顧之憂遣餉不絕全因縱遊說于朝

復請建閭山陽又遣使入金且欲銷朝廷兵備乃遣軍士楊椿潛入京師皇城縱火焚御前軍器庫於是先朝兵甲盡喪金欲先據揚州以渡江分兵徇通泰以趨海其下皆曰通泰鹽場在焉莫若先取為家計且使朝廷失鹽利金欲朝廷不為備且雖反而不敢遽絕其給乃挾蒙古李宣差宋宣差以恫疑虛喝而蒙古實未嘗資全兵其李宣差則青州賣藥人也朝廷雖知其奸姑事苟安不之詰及金糴麥舟過鹽城知揚州翟朝宗嗾尉

兵奪之全怒以捕盜為名水陸數萬徑擣鹽城戍將陳  
益樓殫知縣陳遇皆遁全入城據之朝廷倉皇遣幹官  
王節愬全退師全不許留鄭祥董友守鹽城而自提兵  
還楚州以狀白于朝曰遣兵捕盜過鹽城縣令自棄城  
遁去慮軍民驚擾不免入城安衆朝廷乃授全節鉞令  
釋兵命制置司幹官往諭之全曰朝廷待我如小兒啼  
則與果不受制命朝廷為罷朝宗命通判趙汝夫攝州  
事先是士大夫無賢愚皆策李全必反而不敢言國子

監丞度正獨上疏極言之且獻斃全之策有三其言頗  
亮激切時不能用至是趙范趙葵深以全必反為慮累  
疏力言之史彌遠不納 冬十月以趙善湘為江淮制  
置使時李全造舟益急至發塚取黏板煉鐵錢為釘熬  
囚脂搗油灰列炬繼晷招沿海亡命為水手又給趙敬  
夫以蒙古為辭邀增五千人錢糧求誓書鐵券朝廷猶  
遣餉不絕全得米即自轉輸淮海入鹽城以贖其眾他  
軍士見者曰朝廷惟恐賊不飽我曹何力殺賊射陽湖

人皆怨至有養北賊戕淮民之語聞者太息全又遣人以金牌誘脅周安民等造浮橋于喻口以便鹽城往來時史彌遠多在告諸執政又不以為意獨鄭清之深憂之力勸帝討全帝乃以趙善湘制置江淮許便宜從事然猶有內圖進討外用調停之說惟趙范趙葵兄弟力請進兵討之十二月庚申李全突至揚州灣頭揚州副都統丁勝拒之全乃攻城南門趙敬夫得史彌遠書許增萬五千名糧勸全歸楚州即遣劉易就全壘示之

全笑曰史丞相勸我歸丁都統與我戰非相給耶檄書  
不受敬夫恐亟迎趙范于鎮江范亦刻日約葵葵帥雄  
勝寧淮武定強勇四軍萬四千赴之時全引兵攻秦州  
知州宋濟迎降全入坐郡治盡收其子女貨幣將趨揚  
州聞范葵已入揚城乃鞭鄭衍德曰我計先取揚州渡江  
爾曹勸我取通秦今二趙已入揚州矣江其可渡耶既  
而曰今惟有徑搗揚州耳遂分兵守秦而悉衆攻揚州  
至灣頭立砦據運河之衝使胡義將先鋒至平山堂以



俟三城機便全攻東門葵親搏戰全將張友呼城門請  
葵出葵出與全隔濠立馬相勞苦問全來何為全曰朝  
廷動見猜疑今復絕我糧餉我非背叛索錢糧耳葵曰  
朝廷待汝以忠臣孝子汝乃反戈攻陷城邑朝廷安得  
不絕汝糧餉汝云非叛欺人乎欺天平全無以對彎弓  
抽矢向葵而去自是屢戰全兵多敗全每云我不要淮  
上州縣渡江浮海徑至蘇杭孰能當我然全志吞揚州  
三城而兵每不得傳城下宗雄武獻策曰城中素無薪

且儲畜為總領所支借殆盡若築長圍三城自困全乃  
悉眾及驅鄉農凡數十萬列砦圍三城制司總所糧援  
俱絕范葵命三城諸門各出兵劫砦舉火為期夜半縱  
兵衝擊殲賊甚眾自是全一意長圍以持久困官軍不  
復薄城全張益奏樂于平山堂布置築圍范令諸門以  
輕兵牽制親帥將士出堡砦西攻之全分兵諸門鏖戰  
自辰至未殺傷相當官兵王青力戰死之明日范出師  
大戰獲全糧數十艘葵亦力戰敗之

四年春正月壬寅趙范趙葵大敗李全於揚州時全浚  
圍城塹范葵遣諸將出揚州東門掩擊全走上城官軍  
躡之蹂溺甚衆范陳于西門賊閉壘不出葵曰賊俟我  
收兵而出耳乃伏騎破垣間收步卒誘之賊兵數千果  
趨濠側李虎力戰城上矢石如雨注賊退有頃賊別隊  
自東北馳至范葵揮步騎夾浮橋吊橋並出為三迭陣  
以待之自己至未與賊大戰別遣虎等以馬步五百出  
賊背而葵率輕兵橫衝之三道夾擊賊敗走始全謀反

已成然多顧忌且懼其黨不順而邊陲喜事者欲挾全  
為重遂贊成之故全決計反及趙善湘趙范趙葵用事  
聲罪致討罷支錢糧攻城不得欲戰不利全始大悔忽  
忽不樂或令左右抱其臂曰是我手否人皆怪之范葵  
夜譏詰朝所向葵曰出東門范曰西出常不利賊必見  
易因其所易而圖之必勝不如出堡塞西門全置酒高  
會于平山堂有堡塞候卒識全檣垂雙拂為號以告范范  
喜謂葵曰此賊勇而輕若果出必成擒矣乃悉精銳數

千而西取官軍素為賊所易者張其旗幟以易之全望見喜謂李宋二宣差曰看我掃南軍官軍見賊突鬪而前亦不知其為全也范麾兵並進葵親搏戰諸軍爭奮賊始疑非前日軍欲走入土城李虎軍已塞其甕門全窘從數十騎北走葵率諸將以制勇寧淮二軍威之全趨新塘自決水後淖深數尺會久晴浮戰塵如燥壤全騎過之皆陷淖中不能自拔制勇軍追及奮長槍三十餘亂刺之全呼曰無殺我我乃頭目羣卒碎其屍而分

其鞍馬器甲併殺三十餘人皆將校也全死餘黨欲潰

國安用不從議推一人為首莫肯相下欲還淮安奉全

妻楊氏范葵追擊大破之乃散去范還揚州捷聞加趙善湘江淮

制置大使范淮東安撫使葵淮東提刑善湘季子汝楨史彌遠婿

也奏請無阻而善湘亦以范葵進取有方慰藉殷勤故能成功

五月趙范趙葵復帥步騎十萬攻鹽城屢敗賊衆遂薄淮安城殺

賊萬計焚二千餘家城中哭聲振 淮安五城俱破斬

首數千燒若柵萬餘家淮北賊歸赴援舟師又勦擊焚

其水柵夷五城餘址賊始懼王旻趙必勝金子才等移  
塔西門與賊大戰又破之全妻楊氏謂鄭衍德曰二十  
年梨花槍天下無敵手今事勢已去撐柱不行汝等未  
降者以我在敵爾遂絕淮而去其黨即遣馮垕等納款  
軍門趙范許之淮安平

宋史紀事本末卷二十三





總校官編修 臣朱 鈐

校對官編修 臣孫希旦

謄錄監生 臣張龍圻